

21/06/2003

Zon Tengah raih pingat emas

ZON Tengah meraih emas pertama menerusi acara empat sepasukan dalam Kejohanan Lawn Bowls Piala Bowls Malaysia 2003 di Kompleks Lawn Bowls Bukit Kiara, Kuala Lumpur semalam. Diwakili pemain Selangor, Zon Tengah mengetepikan cabaran pasukan Zon Utara (Perak), Selatan (Johor), Pantai Timur (Terengganu) dan Borneo (Sabah) dengan mengumpul tujuh mata daripada empat pertemuan.

Berbekalkan berpengalaman Jozaini Johari, Meskam Salimin, Nor Azimi Yusof dan Wan Loqman Hakim, mereka menampilkan kehebatan ketika bertemu Perak (7-0), Johor (seri 13-13), Terengganu (20-14) dan Sabah (23-8).

Pada saingan akhir Selangor diberi tentangan sengit pemain Terengganu yang membariskan Lasnan Mohd Shah, Hashim Mohd Salleh, Tengku Ngah Tengku

Ali dan Salim Othman sebelum mencatat kemenangan, 20-14.

Berikutan kejayaan itu, pemain Selangor ini mengekalkan kejuaraan tahun

lalu dan mencerahkan peluang mereka mengekalkan kejuaraan keseluruhan buat

kali ketiga berturut-turut musim ini.

Bagaimanapun barisan empat sepasukan wanita Selangor kurang menyerlah pada hari kedua kejohanan semalam apabila menamatkan kempen dengan menang

dua kali ke atas Perak (7-0), Terengganu (24-13) tetapi kalah kepada Johor

(14-20) dan Sabah (17-20). Juara acara empat sepasukan wanita akan ditentukan oleh Terengganu dengan Johor yang sama-sama handal dengan dua kemenangan dan kalah sekali.

Hari ini mereka akan meneruskan cabaran untuk menentukan juara perseorangan dan berpasangan lelaki dan wanita serta juara keseluruhan kejohanan kali ketiga bermula tahun 2000.

Setelah dua hari bersaing, juara perseorangan 2003 kejohanan Piala Presiden, Afendy Tan Abdullah dari Sabah berpeluang cerah untuk muncul juara dalam kejohanan Piala Malaysia kali ini.

Affendy yang juga juara 1996 bersaing dengan juara tahun 2000, Tazman Tahir (gambar) dari Selangor yang turut menyerlah dan dijangka mampu menyumbang kepada pasukannya kali ini.

Dalam acara berpasangan lelaki juara kebangsaan 2003, Safuan Said yang

bergandingan dengan Megat Nazim Zainuddin mengetepikan pasangan Selangor,

Mahathir Ahmad dan Azizan Saidon pada kedua semalam, 31-9.